

Pertemuan dua PM diyakini dapat selesaikan isu Malaysia-Singapura

UM 19 JAN 2000
KUALA LUMPUR 18 Jan. — Menteri Luar, Datuk Seri Syed Hamid Albar, yakin pertemuan antara Perdana Menteri Singapura dan Malaysia akan menjadi petunjuk kepada era baru hubungan dua hala kedua-dua buah negara.

Beliau juga tidak menolak kemungkinan satu perjanjian baru akan ditandatangani oleh kedua-dua pemimpin menandakan selesainya beberapa isu yang membelenggu hubungan Malaysia dan Singapura selama ini.

Katanya, persetujuan Goh Chok Tong dan Datuk Seri Dr. Mahathir Mohamad untuk bermesyuarat adalah isyarat pertama isu-isu yang ditimbulkan selama ini mungkin dapat diselesaikan.

Katanya, pertemuan peringkat pegawai yang telah berlangsung sebanyak tiga kali tahun lepas ternyata gagal menyelesaikan beberapa isu.

“Walaupun tarikh pertemuan antara kedua-dua pemimpin itu belum ditetapkan lagi tetapi saya yakin ia akan bertumpu kepada isu-isu yang ‘meretakkan’ hubungan Malaysia dan Singapura secara terperinci,” katanya di sini hari ini.

Beliau diminta mengulas kenyataan Menteri Luar Singapura, S. Jayakumar, bahawa satu mesyuarat yang dicadangkan antara Goh dan Dr. Mahathir mungkin menghasilkan satu hala tuju bagi perbincangan membabitkan pakej isu-isu yang membabitkan kedua-dua negara.